



Na osnovu člana 20. stav (2) tačka a) Kriterija za ocjenjivanje rada sudija u Bosni i Hercegovini („Službeni glasnik BiH”, broj 90/24), člana 27. stav (3) tačka a) Kriterija za ocjenjivanje rada predsjednika sudova u Bosni i Hercegovini („Službeni glasnik BiH”, broj 90/24), člana 2. stav (2) Pravilnika o postupku ocjenjivanja rada nosilaca pravosudnih funkcija („Službeni glasnik BiH”, broj 28/24) i člana 5. stav (2) i (3) Uputstva za primjenu kriterija za ocjenjivanje rada nosilaca pravosudnih funkcija u sudovima u Bosni i Hercegovini (broj 06-08-1-5-5/2025 od 09.04.2025. godine) Visoko sudsko i tužilačko vijeće Bosne i Hercegovine je, na sjednici održanoj 09. i 10.07.2025. godine, donijelo

## **UPUTSTVO O ALGORITMU ZA NASUMIČNI ODABIR PREDMETA ZA ANALITIČKO OCJENJIVANJE RADA NOSILACA PRAVOSUDNIH FUNKCIJA U SUDOVIMA**

### **Član 1.**

#### **(Način rada algoritma za nasumičan odabir predmeta)**

- (1) Nasumičan odabir 3 (tri) predmeta za utvrđivanja analitičkog kvaliteta rada i odluka nosilaca pravosudnih funkcija u sudovima u BiH od strane predsjednika sudskog odjeljenja iz člana 5. stav (2) i (3) Uputstva za primjenu kriterija za ocjenjivanje rada nosilaca pravosudnih funkcija u sudovima u Bosni i Hercegovini vrši se automatski putem algoritma koji je sastavni dio aplikacije Pravosudnog informacionog sistema (u daljem tekstu: Algoritam).
- (2) Predmeti se biraju putem algoritma prema principu unaprijed zadanih pravila iz odredaba propisa iz stava (1) ovog člana i ovog uputstva, koja se primjenjuju po potrebi u više ponavljanja.
- (3) Algoritam se pokreće na način da se izabere određeni ocjenjivani sudija za kojeg se vrši nasumičan odabir predmeta i period ocjenjivanja.

### **Član 2.**

#### **(Nasumični odabir predmeta)**

- (1) Predsjednik sudskog odjeljenja u koje je raspoređen ocjenjivani sudija priprema obrazloženo mišljenje za potrebe utvrđivanja analitičkog kvaliteta rada i odluka tog sudije, na način propisan odredbama člana 6. i člana 20. stav (1) i stav (2) tačka a) Kriterija za ocjenjivanje rada sudija u BiH, tako da pored kontinuiranog praćenja rada, u skladu sa članom 17. Pravilnika o unutrašnjem sudskom poslovanju, tokom perioda ocjenjivanja dodatno analizira 3 (tri) nasumično odabrana predmeta ocjenjivanog sudije.
- (2) Izuzetno od stava (1) ovog člana nasumični odabir predmeta vrši predsjednik suda, odnosno predsjednik sudskog odjeljenja neposredno višeg suda u skladu sa članom 20. stav (6) Kriterija za ocjenjivanje rada sudija u BiH, odnosno članom 27. stav (3) tačka a) Kriterija za ocjenjivanje rada predsjednika sudova u BiH.
- (3) Algoritmom će se vršiti nasumični odabir predmeta primjenom sljedećih pravila u Sistemu za automatsko upravljanje predmetima u sudovima:

- a) Primjenom pravila 1 se vrši nasumičan odabir jednog predmeta koji je u periodu ocjenjivanja okončan meritornom odlukom ispitanom od strane višestepenog suda;
  - b) Primjenom pravila 2 se vrši nasumičan odabir jednog predmeta koji je u periodu ocjenjivanja pravomoćno okončan meritornom odlukom protiv koje nije bio izjavljen pravni lijek;
  - c) Primjenom pravila 3 se vrši nasumičan odabir jednog predmeta koji je u periodu ocjenjivanja okončan procesnom odlukom.
- (4) Ukoliko ocjenjivani sudija nije imao u radu predmete obuhvaćene pravilom 1 ili pravilom 2 ili pravilom 3, algoritmom se vrši nasumičan odabir nedostajućeg predmeta primjenom ostalih pravila iz stava (3) ovog člana, pri čemu pravilo 1 ima prednost u odnosu na pravilo 2 i pravilo 3, dok pravilo 2 ima prednost u odnosu na pravilo 3.
- (5) Pod predmetom koji je okončan meritornom odlukom iz stava (3) tačka a) i b) ovog člana podrazumijevaju se svi predmeti u kojima je u Sistemu za automatsko upravljanje predmetima u sudovima, shodno Pravilniku o orijentacionim mjerilima za rad sudija i stručnih saradnika u sudovima u BiH, evidentiran način završetka Odluka u meritumu.
- (6) Pod predmetom koji je okončan procesnom odlukom iz stava (3) tačka c) ovog člana podrazumijevaju se svi predmeti u kojima je u Sistemu za automatsko upravljanje predmetima u sudovima, shodno Pravilniku o orijentacionim mjerilima za rad sudija i stručnih saradnika u sudovima u BiH, evidentiran način završetka Procesna odluka, kao i drugi predmeti sa evidentiranim načinom završetka predviđeni Pravilnikom o orijentacionim mjerilima za rad sudija i stručnih saradnika u sudovima u BiH.

### **Član 3.**

#### **(Nasumični odabir predmeta u sudovima u kojima nisu formirana sudska odjeljenja)**

Ukoliko u sudu nisu formirana sudska odjeljenja nasumični odabir predmeta ocjenjivanog sudije provodi se na način da se kroz Sistem za automatsko upravljanje predmetima u sudovima uzimaju u obzir svi predmeti koje je određeni nosilac pravosudne funkcije iskazao završenim u periodu ocjenjivanja, te se na osnovu toga izračunavaju udjeli pojedinih referata u ukupnom broju završenih predmeta ocjenjivanog sudije i u skladu sa tim vrši se odabir predmeta u skladu sa članom 2. ovog uputstva.

### **Član 4.**

#### **(Isključenje predmeta iz nasumičnog odabira)**

(1) U slučaju kada se ocjenjivač zbog malog broja poduzetih radnji u nasumično odabranom predmetu ne može utvrditi analitičku kvalitetu rada i odluka prema elementima iz člana 20. Kriterija za ocjenjivanje rada sudija u BiH, predsjednik odjeljenja će u konsultaciji sa predsjednikom suda dostaviti VSTV BiH bez odlaganja obrazloženi zahtjev da se takav predmet ukloni iz odabira, odnosno omogući nasumični odabir novog predmeta.

(2) Opravdanost zahtjeva iz stava (1) ovog člana će cijeliti Stalna komisija za efikasnost i kvalitet sudova. Ako se zahtjev ocjeni kao opravdan, Odjel za informaciono-komunikacijsku tehnologiju Sekretarijata VSTV BiH će iz Sistema za automatsko upravljanje predmetima u sudovima ukloniti predmet naveden u zahtjevu suda, te će se sudu omogućiti da izvrši ponovni nasumični odabir predmeta za utvrđivanje analitičke kvalitete rada i odluka.

(3) Algoritmom su, za konkretan period ocjenjivanja, iz nasumičnog odabira isključeni predmeti koji su već bili nasumično odabarni iz Sistema za automatsko upravljanje predmetima u sudovima.

**Član 5.**  
**(Evidencija nasumično odabranih predmeta)**

Predmeti nasumično odabrani u skladu sa odredbama ovog uputstva se upisuju u posebnu tabelu u bazi Sistema za automatsko upravljanje predmetima u sudovima, kako bi se sačuvala istorija nasumičnog odabira predmeta za analitičko ocjenjivanje i kako bi se nasumično odabrani predmeti isključili iz daljeg nasumičnog odabira predmeta za potrebe utvrđivanja analitičkog kvaliteta rada i odluka ocjenjivanog sudije.

**Član 6.**  
**(Stupanje na snagu)**

Ovo uputstvo stupa na snagu danom donošenja.

Broj: 06-08-1-5-6/2025  
Sarajevo, 09.07.2025. godine

Predsjednik VSTV BiH  
Sanin Bogunić

